

Արձանագրություն N 2  
ՀՀ գյուղատնտեսության նախարարին կից  
հասարակական խորհրդի նիստի

ք. Երևան

2 նոյեմբերի 2016թ  
սկիզբը՝ ժամը՝ 10<sup>00</sup>-ին  
ավարտը՝ ժամը 12<sup>00</sup>-ին

Նիստը նախագահում էր ՀՀ գյուղատնտեսության նախարար, խորհրդի նախագահ

**Ի. Առաքելյանը**

Մասնակցում էին՝

խորհրդի անդամներ.

|                         |  |
|-------------------------|--|
| <b>Ա.Թարվերդյան</b>     | Հայաստանի ազգային ագրարային համալսարանի ռեկտոր   |
| <b>Հ. Ջավադյան</b>      | Հայաստանի ազգային ագրարային համալսարանի<br>«Ագրոբիզնես և շուկայաբանություն» ֆակուլտետի ղեկավար   |
| <b>Գ.Սարգսյան</b>       | «Ագրոբիզնեսի և գյուղի զարգացման կենտրոն»<br>հիմնադրամի տնօրեն  |
| <b>Ն. Մանուկյան</b>     | «Արենի» փառատոն» հիմնադրամի տնօրեն   |
| <b>Վ. Համբարձումյան</b> | «Գյուղատնտեսական ասոցիացիաների ֆեդերացիա»<br>իրավաբանական անձանց միության նախագահ  |
| <b>Ս. Ավդալյան</b>      | «Երիտասարդ եզդիներ» հասարակական<br>կազմակերպության նախագահ   |
| <b>Ա.Ղազանչյան</b>      | «Զարգացման սկզբունքներ» հասարակական<br>կազմակերպության նախագահ   |
| <b>Ն.Դարբինյան</b>      | «Էկո-Գլոբ» բնապահպանական հասարակական<br>կազմակերպության նախագահ  |
| <b>Հ.Հարությունյան</b>  | «Հայ գինեգործների միություն» իրավաբանական անձանց<br>միության նախագահ   |
| <b>Հ.Հովհաննիսյան</b>   | «Հայկական պտղատնկարանների ասոցիացիա»<br>գյուղատնտեսական հասարակական կազմակերպության<br>նախագահ   |
| <b>Հ. Ջհանգիրյան</b>    | Հայաստանի Հանրապետության ագրոարդյունաբերողների<br>համակարգի աշխատողների արհեստակցական<br>կազմակերպությունների ճյուղային հանրապետական<br>միության նախագահ |

|                    |  |
|--------------------|--|
| <b>Ս.Ստեփանյան</b> | միության նախագահ<br>Հայաստանի Հանրապետության թռչնաբույծների միության նախագահ         |
| <b>Ա. Բիլյան</b>   | «Մամթերք արտադրողների միություն» իրավաբանական անձանց միության նախագահ                |
| <b>Ռ.Ծառուկյան</b> | «Մուլտի Ագրո» գիտարտադրական կենտրոն» ՍՊԸ-ի տնօրեն                                    |
| <b>Ա. Իսկոյան</b>  | «Շրջակա միջավայրի իրավական պահպանության կենտրոն» հասարակական կազմակերպության նախագահ |
| <b>Վ.Ղազարյան</b>  | «Հայաստանի արդյունաբերողների և գործարարների միության» անդամ                          |

Հարգելի պատճառներով բացակայում էին խորհրդի հետևյալ անդամները՝

|                      |   |
|----------------------|---|
| <b>Ա. Գրիգորյան</b>  | «Հայկական կոնյակագործների միություն» իրավաբանական անձանց միության նախագահ                                 |
| <b>Ա. Ոսկանյան</b>   | ՀՀ Ազգային ագրարային համալսարան «Ագրարային քաղաքականության և տնտեսագիտության հետազոտական կենտրոնի» տնօրեն |
| <b>Վ. Ուռուտյան</b>  | «Ագրոբիզնեսի հետազոտությունների և կրթության միջազգային կենտրոն» հիմնադրամի ղեկավար                        |
| <b>Ե. Թարվերդյան</b> | «Հայաստանի պահածոյագործների և հյուսարտադրողների միություն» իրավաբանական անձանց միության նախագահ           |
| <b>Ա. Գոմկցյան</b>   | «Օքսֆամ» հայաստանյան մասնաճյուղի գյուղատնտեսական ծրագրերի պատասխանատու                                    |

Հրավիրված էին՝

|                     |   |
|---------------------|---|
| <b>Ա. Պետրոսյան</b> | ՀՀ գյուղատնտեսության նախարարի խորհրդական  |
| <b>Ա.Սմբատյան</b>   | ՀՀ գյուղատնտեսության նախարարի մամուլի քարտուղար   |
| <b>Ս. Սիմոնյան</b>  | ՀՀ գյուղատնտեսության նախարարության աշխատակազմի տեղեկատվության և հասարակայնության հետ կապերի բաժնի պետ |

## Օրակարգ

1. ՀՀ-ում գյուղատնտեսական կոոպերատիվների զարգացման ծրագրի մշակման վերաբերյալ առաջարկությունների ներկայացում:

(Զեկուցող՝ ՀՀ գյուղատնտեսության նախարարին կից հասարակական խորհրդի անդամ, ՀԱԱՀ «Ագրոբիզնես և շուկայաբանություն» ֆակուլտետի դեկան Հր. Զավադյան )

2. ՀՀ-ում օրգանական շուկայի ներկա իրավիճակը, խնդիրները և հնարավորությունները:

(Զեկուցող՝ ՀՀ գյուղատնտեսության նախարարին կից հասարակական խորհրդի անդամ, «Էկո-Գլոբ» ՀԿ նախագահ Ն. Դարբինյան)

Նիստի սկզբում բացման խոսքով հանդես եկավ ՀՀ գյուղատնտեսության նախարար, հասարակական խորհրդի նախագահ **Ի. Առաքելյանը**:

Ողջունելով խորհրդի անդամներին՝ նախարարը հակիրճ ներկայացրեց նոր կառավարության ծրագրով գյուղատնտեսության ոլորտի զարգացմանն ուղղված առաջնահերթությունները: Նա մասնավորապես նշեց, որ արդեն նախարարությունը ձեռնամուխ է եկել նաև երկարաժամկետ ծրագրի մշակմանը՝ կարևորելով խորհրդի անդամների դիտողություններն ու առաջարկները գյուղատնտեսության զարգացման քաղաքականության ծրագրավորման հարցում: Նախարարի խոսքով՝ ծրագրում ներառված են իրատեսական մոտեցումներ և հաշվի առնելով բյուջետային միջոցների սուղ լինելու հանգամանքը՝ կազմվել է այնպիսի ծրագիր, որը հետաքրքրություն կառաջացնի մասնավոր ներդրողների շրջանում:

Այնուհետև խորհուրդն անցավ օրակարգային հարցերի քննարկմանը:

Օրակարգի առաջին հարցի վերաբերյալ զեկույցով հանդես եկավ Հայաստանի ազգային ագրարային համալսարանի «Ագրոբիզնես և շուկայաբանություն» ֆակուլտետի դեկան **Հ. Զավադյանը**: (զեկույցը կցվում է)

Հ. Զավադյանը կարևորեց Հայաստանում գյուղատնտեսական կոոպերացիայի շարժման խթանումը, «Գյուղատնտեսական կոոպերատիվների մասին» ՀՀ օրենքի ընդունումը, որով իրավական հիմքեր ստեղծվեցին կոոպերատիվների գործունեության խթանման համար:

Զեկուցողի խոսքով՝ գյուղատնտեսական կոոպերատիվների ստեղծման գործընթացը սկսել է ակտիվանալ վերջին տարիներին. ձևավորված շուրջ 306 սպառողական



կոոպերատիվներից գյուղատնտեսական բնույթ ունեն 225-ը: «Համայնքների գյուղատնտեսական ռեսուրսների կառավարման և մրցունակության» ծրագրի շրջանակներում մինչև այժմ ստեղծվել և գործում են արտոգտագործողների 153 սպառողական կոոպերատիվներ, սակայն շարժումը դեռևս բավարար թափ չի հավաքել, և առկա են մի շարք խնդիրներ, այդ թվում՝

-հաճախ կոոպերատիվներում անդամագրվում են մարդիկ, որոնք դժվարությամբ են համակերպվում կոլեկտիվի հետ, չունեն կոլեկտիվ մտածելակերպ,

-դեռևս համընդհանուր բնույթ է կրում բոլոր գյուղաբնակների մոտ թույլ տեղեկացվածությունը և իմացությունը կոոպերատիվների առավելությունների, շուկայական գների, իրացման լավագույն ուղիների առաջավոր փորձի և նոր տեխնոլոգիաների վերաբերյալ,

-դիտարկումները ցույց են տալիս, որ առկա են բազմաթիվ դեպքեր, երբ որոշ սեմինարավարներ բավարար մակարդակով չեն տիրապետում կոոպերացման դրույթներին, և նրանց անհիմն տեսակետները ոչ միայն նպաստում են սկսված գործընթացին, այլ վեր են ածվում արգելքների: Առաջարկվել է այս նպատակով օգտագործել ՀԱԱՀ մասնագիտական ներուժը,

-ապահովված չէ միատեսակ իրավական դաշտ համանման գյուղատնտեսական արտադրանք արտադրող սուբյեկտների համար,

-ձևավորված մեխանիզմները բավարար չեն գյուղատնտեսական ապրանք արտադրողների, վերամշակող ընկերությունների և սպառողների կապերի ամրապնդման համար:

Զեկուցողն առաջարկել է հիմք ընդունելով «Գյուղատնտեսական կոոպերատիվների մասին» ՀՀ օրենքի 28-րդ հոդվածը՝ արագ ընթացք տալ գյուղատնտեսական կոոպերատիվների զարգացման ծրագրի մշակման աշխատանքներին, և այդ աշխատանքների իրականացման համար ձևավորել ծրագրի մշակման պատասխանատու խումբ, ինչպես նաև հանդես է եկել ծրագրի մշակման վերաբերյալ մի շարք առաջարկներով:

Զեկույցի վերաբերյալ ելույթներ ունեցան, առաջարկություններ և հարցեր ներկայացրեցին **Ա. Թարվերդյանը, Ա. Ղազանչյանը, Ա. Հարությունյանը, Վ. Համբարձումյանը, Ս. Ստեփանյանը, Գ. Սարգսյանը:**

**Ա. Ղազանչյանը** –Ես երկու նկատառում ունեմ կոոպերատիվների վերաբերյալ: Նախ՝ անհրաժեշտ է հստակեցնել կոոպերատիվների իրավական կարգավիճակը: Եվ երկրորդ՝ միայն ուսուցում ստանալով կոոպերատիվ չեն ստեղծում. կոպերատիվների ստեղծումը սկսվում է համայնքի մոբիլիզացումից, կա համապատասխան մեթոդաբանություն, և ես չեմ կարծում, որ մեր ագրարային համալսարանը ունի մասնագետներ, ովքեր տիրապետում են այդ մեթոդաբանությանը, սակայն մենք կարող ենք աջակցել:

**Հ. Զավադյանը** չհամաձայնեց հնչեցված տեսակետի հետ՝ շեշտելով, որ ՀԱԱՀ-ն ունի բավարար մասնագիտական ներուժ, և այսօր էլ այնտեղ դասավանդվում է «Գյուղատնտեսական կոոպերատիվներ» առարկան:

**Ս. Ստեփանյան-** Որքանո՞վ է այսօր գործող «Գյուղատնտեսության կոոպերատիվների մասին» ՀՀ օրենքը նպաստում կոոպերատիվների ստեղծմանը: Օրենքը մեկ տարի կիրառության մեջ է, ի՞նչ էք կարծում ունի բացեր, և կարիք կա՞ փոփոխություններ, շտկումներ և լրացումներ կատարելու: Մենք չունեինք գյուղացիական տնտեսությունների դեպի ֆերմերային տնտեսությունների անցման գաղափարի ճիշտ ձևակերպումը, չգիտեինք՝ ով է ֆերմերը, որոնք են նրա իրավունքներն ու պարտականությունները, չունեինք գյուղատնտեսության կամ գյուղմթերք արտադրողների մասին օրենք, սակայն անցանք առաջ և ընդունեցինք այս բավականին պրոգրեսիվ օրենքը: Եվ այն ծրագիրը, որը նախատեսված է ընդունել ըստ այս օրենքի, ո՞վ է լինելու դրա վերահսկման պատասխանատուն:

**Հ. Զավադյան-** Օրենքի ընդունումը շատ կարևոր էր և անհրաժեշտություն, սակայն այն ժամանակ էլ մենք համոզված էինք, որ այն ունենալու է նաև բաց տեղեր: Օրենքը կարևոր հիմքեր է ստեղծում կոոպերատիվների զարգացման համար, սակայն անշուշտ մեկ տարի անցել է, և կան հարցեր, որոնք փոփոխություններ անելու կարիք ունեն: Ինչ վերաբերում է ծրագրի մշակման և իրականացման պատասխանատուներին, ապա այդ հարցը հստակ կարգավորված է օրենքի 8-րդ հոդվածով, համաձայն որի պատասխանատուն հանդիսանում է ՀՀ գյուղատնտեսության նախարարությունը:

**Գագիկ Սարգսյան-** Հայաստանում չկա պրակտիկա, երբ գյուղացիներն ինքնակամ են միացել, դրանք ստեղծվում են կազմակերպությունների, ծրագրերի շրջանակում: Ամբողջ աշխարհում գոյություն ունի կոոպերատիվների ստեղծման երկու ձև՝ մեկը դիկտատորան է, երբ ուժի միջոցով ստեղծվում են կոլտնտեսություններ, մյուսը՝ ազատ, ժողովրդավար պայմաններում ստեղծվող ֆերմերային տնտեսություններն են, որոնք համախմբվում են գաղափարի շուրջ: Հիմա մենք ունենք օրենք սահմանափակ պատասխանատվությամբ ընկերությունների մասին: Եթե օրենք չի լինելու այն մասին, ըստ որի համայնքի անդամներն ինքնակամ համայնքի ղեկավարի օժանդակությամբ կամ աջակցությամբ միավորվում են և ստեղծվում է կոոպերատիվ, այդ ամենը թղթի վրա գրված էլ կմնա: Մինչ այժմ ստեղծված կոոպերատիվները գործում են որպես ՍՊԸ-ներ, ես չեմ տեսել, որ որևէ կոոպերատիվում լինի ժողով, քննարկումներ, նախագահ փոխվի: Այստեղ կա օրենքի խնդիր, մենք պետք է կարողանանք ձևակերպել մի օրենք, որը հնարավորություն կտա գյուղացիներին առանց դոնորի կամ պետության միջամտության ազատ կամարտահայտությամբ միավորվել և լուծարվել:

**Ա. Հարությունյան-** Այս բոլոր առաջարկությունները լրոգելու և գործ չանելու առաջարկություններ են: Գինեգործության, խաղողագործության կոոպերատիվը չի կարող համեմատվել անասնապահական կոոպերատիվի հետ, դրանց աշխատանքի և գոյության փիլիսոփայությունները տարբեր են: Հին մոդելների հիման վրա գրված առաջարկներն են,



կա կոնկրետ միջազգային փորձ, որը պետք էր ուսումնասիրել: Օրենքը որևէ կապ չունի, օրենքը շատ լավն է, կոոպերատիվը պիտի նույն հարկային դաշտում լինի, ինչ մյուս տնտեսավարող սուբյեկտները:

**Ա. Թարվերդյան**-Մենք քննարկում ենք այսօր մեր երկրի գյուղատնտեսության ագրոպարենային ոլորտի առջև ծառայած մի շատ կարևոր հարց: Կոոպերացիայի տարբեր ձևեր և եղանակներ կան, որոնք պետք է քննարկել: Մենք խոսում ենք ֆերմերների, գյուղացիների, վերամշակողների մասին, սակայն չենք հարցրել նրանց կարծիքը: Գյուղացին շատ լավ է հասկանում իր լավն ու վատը, մենք պետք է գյուղացուն լսենք, և հասկանանք, թե որտեղ է ինքը դիսկեր տեսնում, ինչու չի գնում կոոպերացման: 1999 թվականից կոոպերացիայի հարցը պարբերաբար քննարկվում է կոլեգիայի, հասարակական խորհրդի նիստերում և խորհրդակցություններում: Առաջարկում եմ կազմավորել խումբ հասարակական խորհրդի անդամներից, ովքեր մտահոգ են այս հարցով, մենք կտրամադրենք լսարան, գյուղացիական տնտեսություններին և ֆերմերներին բերենք մայրաքաղաք և լայն աշխատանքային քննարկում ծավալենք, որից հետո կմշակվեն օրենքի փոփոխությունները, ծրագիրը, կանոնակարգն ու ընթացակարգը:

**Վ. Համբարձումյան**-Գյուղացիների մտահոգություններից մեկն այն է, որ նրանք կոոպերատիվներ ստեղծելով կհայտնվեն հարկային դաշտում: Շատ քիչ կոոպերատիվներ կան, որոնք ինքնաբուխ են ստեղծվել, դրա համար շատ լուրջ պայմաններ են պետք երկրում: Մշտապես անհրաժեշտ է մի իմպուլս, դրդող ուժ, քանի որ աշխարհում չկա այդպիսի փորձ, որ այդ շարժումը պարտադիր պետք է ինքնաբուխ լինի, նամանավանդ այնպիսի երկրներում, որտեղ հողօգտագործողների տարածքը 2 հա-ից պակաս է: Կարևորն այն է, որպեսզի մենք տեսնենք նոր որակի հարաբերություններ, երբ ֆերմերները մրցակցային փոխհարաբերություններից անցնում են համագործակցայինի: Սա մտածողություն է, գաղափար, որը հասունացնելու համար անհրաժեշտ են պայմաններ, օրինակ՝ լիդերի ինստիտուտի ձևավորումը:

**Ի. Առաքելյան** *(Պաշտոնական մեկնաբանություն)* Ինչպես Դուք իրավացիորեն նշեցիք Ձեր զեկույցում, այսօր ֆերմերներն իսկապես ունեն տեղեկացվածության պակաս: Այն հաջողված կոոպերատիվները, որոնց մասին Դուք հիշատակում էիք, ստեղծվել են «Համայնքների գյուղատնտեսական ռեսուրսների կառավարման և մրցունակության» ծրագրի շրջանակում, և դրանց ստեղծման շարժառիթն այն է, որ ծրագիրը 50 տոկոս համաֆինանսավորում է տալիս (գյուղտեխնիկա, սարքավորումներ և այլն): Սակայն կան դեպքեր, երբ ամեն ինչ ավարտվում է, երբ տեխնիկան տեղ է հասնում: Ես համաձայն եմ, որ միայն հարկային արտոնություններ տալով խնդիրը չի վերանա: Իմ կարծիքով կոոպերատիվը պետք է դառնա արտադրող, առաջին փուլի վերամշակող, որպեսզի այդ միավորումը ֆերմերի համար եկամտի լրացուցիչ աղբյուր հանդիսանա, հակառակ պարագայում հողատարածքների միավորմամբ նրանք իհարկե որոշակի ծախսերի տնտեսում կունենան, սակայն այնուհետև բախվելու են իրացման խնդրին: Գյուղացին պետք է հումքը վերամշակելու հնարավորություն ունենա, և ինքն էլ զբաղվի իրացման հարցով: Եթե մենք կարողանանք կոոպերացիայի հարցը հասցնել մինչև իրացում, իհարկե այս դեպքում նաև պետք է շատ գրագետ

կառավարիչներ աշխատեն, կոոպերատիվը նրանց ձեռնտու կլինի: Այսօր ֆերմերը մնացել է միայնակ մթերողի, խոշոր գնորդի դեմ: Եթե կազմակերպող չլինի, մարզպետը, գյուղապետն այս խնդրում չներգրավվեն, մենք ինչ օրենք էլ գրենք, չի աշխատելու:

Նախարարն առաջարկել է խորհրդի բոլոր այն անդամներին, ովքեր կարծում են, որ օրենքը թերի է և չի նպաստում կոոպերացիայի շարժման խթանմանը և ունեն առաջարկներ օրենքում փոփոխություններ կատարելու վերաբերյալ, դրանք գրավոր ներակայացնել նախարարության աշխատակազմ:

#### ՄԻԱԶԱՅՆ ՈՐՈՇՎԵՑ.

1. Առաջարկել խորհրդի անդամներին գրավոր ՀՀ գյուղատնտեսության նախարարության աշխատակազմ ներկայացնել «Գյուղատնտեսական կոոպերատիվների մասին» ՀՀ օրենքում փոփոխություններ և լրացումներ կատարելու մասին իրենց առաջարկությունները:
2. Հավանություն տալ խորհրդի անդամ Ա. Թարվերոյանի առաջարկին՝ Հայաստանի ազգային ագրարային համալսարանում խորհրդի շահագրգիռ անդամների և գյուղացիական տնտեսությունների մասնակցությամբ քննակում կազմակերպելու վերաբերյալ, և քննարկումների արդյունքները ներկայացնել խորհրդի նախագահին:

Օրակարգի երկրորդ հարցի զեկուցմամբ հանդես եկավ ՀՀ գյուղատնտեսության նախարարին կից հասարակական խորհրդի անդամ, «Էկո Գլոբ» ՀԿ-ի նախագահ Ն. Դարբինյանը: (զեկույցը կցվում է)

Ն. Դարբինյանը նշեց, որ օրգանական գյուղատնտեսությունն առաջին անգամ ներկայացվել է Հայաստանում 2002թ.: 2012 թվականի տվյալներով՝ օրգանական գյուղատնտեսության արտադրության ընդհանուր տարածքը մեր երկրում կազմում է 19 000 հա: Ներքին շուկան թույլ է զարգացած: Հայկական օրգանական արտադրանքի առաջին արտահանումները սկսվել են 2008թ-ից, ծավալները ժամանակի ընթացքում աճում են, սակայն քանակն ու մատակարարման պարբերականությունը դեռևս բավարար չեն: Զեկուցողը հավելեց, որ Հայաստանում արտադրվող օրգանական գյուղմթերքը մրցակցային է արտերկրի շուկայում, ունի արտահանման լայն հնարավորություններ, սակայն այսօր ծավալները շատ փոքր են, առաջարկը հետ է մնում պահանջարկից, ոլորտը զարգանում է ինքնաբուխ կերպով, որտեղ հիմնական շոգեքարշները մասնավոր ընկերություններն են՝ օրգանական գյուղատնտեսության ընդլայնման հարցում կարևորելով պետական և մասնավոր հատվածների սերտ համագործակցության հարցը: Զեկուցողը անդրադարձել է նաև սպառողների շահերի պաշտպանության խնդիրներին, ինչպես նաև հանդես է եկել մի շարք առաջարկություններով: Մասնավորապես առաջարկվել է մշակել Օրգանական



գյուղատնտեսության ազգային պլան՝ ճյուղի զարգացման քաղաքականության համակարգված կիրարկումն ապահովելու համար:

Ձեկույցի վերաբերյալ ելույթներ ունեցան, առաջարկություններ և հարցեր ներկայացրեցին **Ռ. Ծառուկյանը, Ն. Մանուկյանը, Ա. Ղազանչյանը, Ս. Ստեփանյանը:**

**Ռ. Ծառուկյան-**Առ այսօր քանի՞ տնտեսություն ունենք, որոնք արտադրում են էկոլոգիապես մաքուր մեղր ՀՀ-ում, և ո՞ր տարածաշրջանում: Ուսումնասիրություններ են իրականացվել ներքին շուկայում, մանրածախ առևտրի կենտրոններից տարբեր ընկերությունների արտադրած մեղրի նմուշառում է կատարվել և լավագույնը ճանաչվել է «Մուլտի Ագրոյի» մեղրը, դուք ունե՞ք այդ մասին տեղեկություններ:

**Ն. Դարբինյան-**Մոտ 6 տնտեսություն ունենք Կոտայքի, Արարատի մարզերում, Ղարաբաղում: Արտադրության ծավալները փոքր են, բայց պոտենցիալը Հայաստանում օրգանական մեղր արտադրելու բավականին մեծ է: Ձեր աշխատողները մեզ պարբերաբար այցելում են, մենք բացատրում ենք սերտիֆիկացման ընթացակարգը, սակայն այնուհետև որևէ արձագանք չի լինում:

**Ն. Մանուկյան-**Մենք Հայաստանում փորձում ենք զարկ տալ գաստրոնոմիական տուրիզմին, քանի որ նշում ենք, որ ունենք էկոլոգիապես մաքուր սնունդ, ինչը գրավում է զբոսաշրջիկներին: Սակայն երկրում ունենք զանազան էկոլոգիական խնդիրներ, արդյո՞ք այստեղ ամեն ինչ ճիշտ է ասվում, և մենք կարող ենք վստահ լինեն, որ անգամ մեղրը էկոլոգիապես մաքուր է:

**Ն. Դարբինյան-**Օրենքը սահմանում է, որ եթե որևէ արտադրանք կոչվում է էկոլոգիապես մաքուր, բիո, օրգանական, պետք է համապատասխանի շատ խիստ սահմանափակումներով ստանդարտների, իսկ դրանք շատ ավելի խիստ են, քան այն, ինչ պահանջվում է սովորական արտադրության պարագայում: Եվ ինքնահայտարարությունները, բարձրագույն արտահայտությունները, որ մենք արտադրել ենք էկոլոգիապես մաքուր մթերք, սպառողին մոլորության մեջ գցելու նպատակ են միայն հետապնդում:

**Ա. Ղազանչյան-**Ես համամիտ եմ, որ օրգանական մթերքը չի կարող մեծ մասնաբաժին ունենալ շուկայում, պետք է բավարարվենք օպտիմալ քանակներով, և պետք է այնպես անենք, որպեսզի այն արտացոլի իրականությունը: Բացի օրգանիկից, մենք ունենք մեր ավանդական հայկական մթերքները, խոսքն այսպես կոչված «slaw food»-ի մասին է, և մենք պետք է քայլեր ձեռնարկենք պահպանելու մեր տեղական արտադրանքը: Մենք վերջերս Եվրոպայում էինք, բոլորը «լացում են». այնտեղ տեղական գյուղմթերք չի մնացել, անգամ Բուլղարիայում տեղական խնձոր չկա: Այնպես որ այս հարցին էլ պետք է ուշադրություն դարձնել, և եթե մթերքը օրգանիկ չէ, դեռ չի նշանակում, որ վատն է: «Գաստրոնոմիական տուրիզմը» պետք է հիմնված լինի հենց այդ ավանդական, տեղական սննդի վրա և ոչ թե էկոարտադրանքի:



**Ս. Ստեփանյան**-Ցանկանում եմ շնորհակալություն հայտնել տիկին Դարբինյանին հատկապես վերջին երկու տարիների ընթացքում իր և իր ղեկավարած կազմակերպության ծավալած գործունեության համար: Լուրջ աշխատանք եք իրականացնում, ցանկանում եմ հաջողություններ մաղթել: Ես կարծում եմ, որ օրգանական շուկայի զարգացումը շատ բնական պրոցես է, և մեզ պետք չէ այն արհեստականորեն ընդլայնել, ով կցանկանա, կձգտի, թող հասնի, ով չի կարող, պարտադիր չէ: Նաև իրազեկման կարգով ցանկանում եմ նշել, որ ՀՀ-ում արտադրանքի մակնշման համար «էկո» անվանումը արգելվում է օգտագործել որպես որակ բնորոշող բառ, և բոլոր այն տնտեսավարողները, որոնք օգտագործել են այդ տերմինը, տուգանքներից հետո ուղղակի չակերտների մեջ են վերցնում այդ բառը: Այստեղ կա օրենսդրական լուրջ բաց:

**Ի. Առաքելյան**-(պաշտոնական մեկնաբանություն) Մենք պետք է հետևողական և խիստ պայքար տանենք սպառողների շահերի պաշտպանությունն ապահովելու համար: Այսօր ներքին շուկան այնքան մոլորված է, որ էկոլոգիական արտադրանքը գնահատելու հարցն էլ է խնդիր, արտահանման տեսանկյունից այն առավել շահեկան կարող է լինել: Կարծում եմ, որ մենք պետք է քայլեր ձեռնարկենք խստացնելու օրենսդրությունը, և տնտեսավարողը չպետք է իրավունք ունենա անգամ ապրանքանիշի անվանման մեջ օգտագործել «էկո» տերմինը:

ՄԻԱԶԱՅՆ ՈՐՈՇՎԵՑ.

**Ի գիտություն ընդունել Ն. Դարբինյանի զեկույցը «ՀՀ-ում օրգանական շուկայի ներկա իրավիճակը, խնդիրները և հնարավորությունները» թեմայով:**


ՀԱՍԱՐԱԿԱԿԱՆ  
ԽՈՐՀՐԴԻ ՆԱԽԱԳԱՀ՝



Ի. ԱՌԱՔԵԼՅԱՆ

ՏԵՂԵԿԱՏՎՈՒԹՅԱՆ ԵՎ ՀԱՍԱՐԱԿԱՅՆՈՒԹՅԱՆ

ՀԵՏ ԿԱՊԵՐԻ ԲԱԺՆԻ ՊԵՏ՝



Ս. ՍԻՄՈՆՅԱՆ